

1 2008

787 к

МТГ

МЕМЛЕКЕТТИК ТЛ - ТҮФÝРЫҢ

Мәулен БАЛАҚАЕВ

ҚАЗІРГІ  
ҚАЗАҚ  
ТЛІ





---

МЕМЛЕКЕТТИК ТІЛ - ТҮФҮРЫН,

Мәулен БАЛАҚАЕВ

ҚАЗІРГІ  
ҚАЗАҚ  
ТІЛІ



“Ер-Дәүләт”

Астана

2007

ББК 81.2 Қаз.

Б 22

**ҚАЗАҚСТАН РЕСПУБЛИКАСЫ  
МӘДЕНИЕТ ЖӘНЕ АҚПАРАТ МИНИСТРЛІГІ**

**АҚПАРАТ ЖӘНЕ МҰРАҒАТ КОМИТЕТИНІҢ  
БАҒДАРЛАМАСЫ БОЙЫНША ШЫҒАРЫЛДЫ**

**Балақаев М.**

Б 22      **Қазіргі қазақ тілі.** – Астана: Ер-Дәulet, 2007. - 128 бет

**ISBN 9965-436-41-X**

Көрнекті филолог-ғалым Мәулен Балақаевтың қазак тіліндегі жай сөйлем синтаксисі мәселесін терең зерттеп, ғылыми түрде жүйелеген еңбегі тіл мамандары тарарапынан жоғары бағага ие болып келеді.

Оқулық жоғары оку орындарының филология факультеттерінің студенттеріне, тіл білімі мәселелерін зерттейтін ғалымдарға арналған.

**4602020400**

**Б-----хабарландырылған – 2007  
00(05)-07**

**ББК 81.2 Қаз.**

**ISBN 9965-436-41-X**

© Балақаев М. 2007

© “Ер-Дәulet”, 2007

# ЖАЙ СӨЙЛЕМ СИНТАКСИСІ

## § 1. Сөйлемнің құрамы туралы түсінік

Тіл – қарым-қатынас жасаудың құралы да, сөйлем – сол қарым-қатынас жасауда кісінің ойын айтудың негізгі формасы. Кісінің ойы әр алуан, әр қылыш болатындықтан, соларды айту үшін жұмсалатын сөйлемдер, олардың құрамы да түрлі-түрлі болады. Кейде бір сөз бір сөйлем қызметінде жұмсалса (*Тұн. – Аттан! Масқара! – Көрдің бе? – Көрдім. – Көріне ме? – Жоқ.*), кейде екі не одан да көп сөздерді, сөз тіркестерін құрастыру арқылы сөйлем жасалады.

Сөйлем құрамындағы сөздің саны аз болуы, көп болуы ой ерекшелігімен, стиль ерекшелігімен байланысты.

Сөйлем құрамындағы сөздер өзара тіркесу арқылы белгілі қызметте жұмсалады, басқаша айтқанда, сөйлемдегі бір сөздің сөйлем мүшесі болуына сонымен тіркескен басқа сөз себепкер болады. Мысалы, бастауышты баяндауышпен байланысына қарап (және керісінше), анықтауышты анықталатын сөзіне қатысына қарап сөйлем мүшесі деп танимыз.

Сөйтіп, көп құрамды сөйлемдерді бөлшектегенде, олардың ішіндегі сөздердің лексикалық мағыналарына қарамай, лексикалық мағыналары толық сөздердің тіркесу нәтижесінде пайда болған грамматикалық мағыналарға караймыз. Ол мағыналар: бастауыш-баяндауыштық, толықтауыштық анықтауыштық және пысықтауыштық болады.

Сөйлемде осылардай грамматикалық мағыналарға ие болып, синтаксистік қызмет аткарып тұратын сөздерді сөйлем мүшелері дейміз. Жай сөйлемдер құрамдық ерекшеліктеріне сәйкес жалан және жайылма болып бөлінеді.

Жалан сөйлем бастауыш пен баяндауыштан /не оның бірінен құралады.

Ал сөйлем құрамында бастауыш, баяндауыштан басқа тұрлаусыз мүшелер не олардың бірі болса, сөйлемнің іргесі кеңіп, ол жайылмаға айналады. Мысалы, жел өриелене түсті – жалан. *Ызгарлы* жел өриелене түсті – жайылма. Толқын күшейді – жалан. *Теңіздің* толқыны кешке таман күшейді – жайылма.

Жайылма сөйлемдегі тұрлаусыз мүшелер не бастауыштын, не баяндауыштың (кейде екеуінің де) маңына топталады:

1. **Ызғарлы жел өршелене тұсті.**

2. Өзің көтермейтін сөзді басқаға **айтпа**.

3. Жылайын деген бала әкесінің сакалымен **ойнайды**. (Макал.)

4. Текіздің **толқыны** кеменің бүйіріне **соғады**.

5. ...екі әйел Ертіс шетіндегі... көп қайықтың бір бүтіндеуіне отырып Арапға **тартты**. (Ж. Аймауытов)

Сөйлем кұруға негіз болатын бас мүшелер – тұрлаулы мүшелер – сөйлем атаулының грамматикалық ұйыткысы. Ал тұрлаусыз мүшелер тұрлаулы мүшелердің маңына топтанып не тікелей соларды, не бірін-бірі анықтап, толықтап, пысықтап тұрады. Мысалы: *Шығысқа қараій беттеген үлкен кеме тоғынды тәңізді тіліп келеді*.

Бұл сөйлемнің бастауышы – *кеме*, баяндауышы – *тіліп келеді*. Олардан басқа мүшелер сол екеуінің маңына топтанып, екі шумак құралған да, әр шумактағы сөздер біріне-бірі бағынып барып, не тікелей бастауышка, не баяндауышка бағынған.

Тұрлаусыз мүшелер – толықтауыш, анықтауыш, пысықтауыш болып үшке бөлінеді.

Сөйлем мүшелерінің құрамы дара, құрделі, үйірлі болады. Мысалы: *Жаңбырмен жер көгерер, еңбекпен ет көгерер* (Дара мүшелі). *Үріс алды – ынтымақ* (Құрделі бастауышты). *Жері байдың елі бай* (Үйірлі анықтауышты).

Сөйлемнің мүшелері өзара синтаксистік байланыста айтылады. Сөйлем мүшелеріне сұраптар қою арқылы талдау жасағанда, олардың сол байланыс желісі үзілмегені макұл. Мысалы, *Көл жағалай қонады қу менен қаз* (Абай) деген сөйлемнің мүшелерін ажыратып тану үшін талдауды бастауыш-баяндауыштан бастап, сұрапты былай қоямыз.

*Не қонады? – Қу менен қаз қонады?*

*Қалай қонады? – Көл жағалай қонады.*

Сөйлемнің құрамында сөйлем мүшелерінен басқа да сөздер болады, олар – каратпа, қыстырма, одагай сөздер. Бұлар жинақталып, сөйлемдегі оқшау сөздер деп аталады. Оқшау сөздер сөйлеммен не сөйлем мүшелерімен тек мағыналық байланыста айтылады да, олармен синтаксистік байланыста болмайды. Сондыктан оларды сөйлем мүшелері деп танымаймыз.

Сөйлемнің құрамында әр алуан сөздер болады. Олардың көпшілігі өзара мағыналық, синтаксистік байланыста айтылу арқылы мүшелік қызметке ие болады. Сөйлем құрамының негізі – бастауыш пен баяндауыш, болғанмен Сөйлем құрамында баяндауыштың синтаксистік қызметі басым ерекше (ол кейін айтылады).

Сөйтіп, мағыналық, синтаксистік қарым-қатынасы дербес синтаксистік қызмет атқаратын сөздерді, күрделі сөздер тобын **сөйлем мүшесі** дейміз.

## § 2. Сөйлемнің тұрлаулы мүшелері

Дүкенде Қарабайга жәрдемдесетін адам жоқ. Көрікті де оның өзі басады, темірді де өзі қыздырады, істі де өзі согады. (С. Мұқанов.) Бұл сөйлемдерде әр сөз керегіне қарай өз орнында, синтаксистік қызметте жұмсалған. Соңдықтан оларда айтылған ойға қатысы жоқ сөз де жоқ. Солардың басын құрастырып, әр сөйлемде айтылған ойға әрбір мүшени ортақ етіп тұрған бас мүшелер – бастауыш пен баяндауыштар: *адам жоқ, өзі басады, өзі қыздырады, өзі согады*. Бұлар сөйлем құрамының діңгегі, айтылған ойлардың негізгі қаңқасы. Басқа мүшелер солармен бір тұтас құрамда айтылғандықтан ұтымда да, оларсыз шала-жансар, сөйлемдік қасиеті жоқ сөздер тізбегі ғана. Ал бастауыш пен баяндауыштар топтары бөлек алғанда да әрі сөйлем, әрі мандарында басқа да мүшелердің болуын тілейтіндей әрі тіректі тіркес.

Осындай, сөйлем құрауға негіз болатын, өзара предикаттық қатынаста жұмсалатын сөйлем мүшелерін – тұрлаулы (бас) мүшелер дейміз.

Тұрлаулы мүшелердің синтаксистік қызметі бірдей емес. Әдетте бастауыш сөйлемде айтылатын ойға негіз болады, ол баяндауыш арқылы айтылған қимылдың не басқа сапаның субъектісі (иесі) болады.

Баяндауыш бастауыштың ісін, қимылын, күйін және басқа заттық, сындық сапасын білдіріп, бастауышқа бағынады. Бұл жағынан тұрлаулы мүшелердің ең негізгісі – бастауыш, бірақ сөйлемдегі қызметі жағынан бастауыштан гөрі баяндауыштың синтаксистік қызметі анағұрлым басым болатыны белгілі. Оны мыналардан байқаймыз:

1. Баяндауыш сөйлем арқылы айтылған ойды тиянактап, көптеген сөздерді ілестіріп барып, сөйлемді аяқтап тұрады. Бұл жағынан ол – сөйлемнің ең негізгі ұйымдастыруыш мүшесі.

## БАСТАУЫШ

### § 3. Бастауыштың жасалуы

2. Бастауыштың мағынасы баяндауыштың морфологиялық құрамындағы тұлғалар арқылы белгілі болып дербес тұра береді. Ондайда бастауыш сөйлем ішінде арнайы айтылмай, сөйлем толымсыз болуы да мүмкін. Ал баяндауышсыз толымсыз сөйлемдер өте сирек кездеседі. Әсіресе диалогта, мақал-мәтеде (“қой баласы – қозыдан” сияқты) баяндауыштың “түсіп қалуы” ықшамдылықпен байланысты.

Осындай, баяндауыштың синтаксистік қызметі бастауыштан басым болғанына қарап, баяндауышты ғана бас мүше деп қарау дұрыс болмайды. Шынында, ол екеуі де – сөйлем құрауға ұйытқы болатын, басқа мүшелерді айналасына үйіріп тұратын, сөйлемнің дінгекті орталығы – бас мүшелер.

Бастауыштың грамматикалық тұлғасы – сөздің атап тұлғасы. Басқаша айтқанда, бастауыш қызметінде жұмсалған сөз не сөз тіркесі атап септігінде тұрады<sup>1</sup>

#### Ескерту:

Бастауыштар кейде формаланбаған ілік септігінде де айтылады; ондай ілік септікті бастауышы бар сөйлемнің баяндауышы не тәуелдік жалғаулы сөз күрделі баяндауыштың құрамында болып келеді:

*Шығанақ поча конторындағы радиога құлағын төсөп отырганы. (F. Мұстафин.) Тас түсіріп тұрса, мына біреулер жәнжал ишігарып тұрганы. (К. Әбдиқадыров.)*

*Біз суды осы Мырзашөлге жеткізуіміз керек. (С. Мұқанов.) Мен Гүлжсанамен әлі жөнди әңгімелескенім жоқ. (Ә. Әбішев.)*

Бастауыштарға койылатын негізгі сұраптар: кім?, не? Бастауыш қызметінде жұмсалатын сөздердің көптік, тәуелдік жалғауларда жұмсалуына қарай жоғарғы сұраптар да сол жалғауларда айтылуы мүмкін. Бұл сұраптар сөйлемде бастауыш болар деген сөздерге жалан күйінде қойылмайды, баяндауыштармен қабаттаса қойылады. Мысалы: *Ажар*

<sup>1</sup>Атап тұлғалы сөздер әр уақытта бастауыш кана бола бермейді, сөйлемнің баска да мүшелері болады. Дегенмен, атап септігін, негізінде, бастауыштық тұлға деп қараймыз.

*баяндама жасады* (Кім баяндама жасады? – *Ажар...*) (*Айту оңай, істей қын* (Не оңай? – *Айту...* не қын? – *Істей...*). *Еріншектің ертеңі бітпес*) (Несі бітпес? – *Ертеңі...*)

**Ескерту:** Жалпы алғанда, бастауыш бола алмайтын сөз жок. Белгілі жағдайда (субстантивтеніп қолданылғанда), тіпті, өз алдына сөйлем мүшесі болмайды дейтін шылау сөздер де, сөз емес, сөз кұрау үшін жұмсалатын жеке дыбыстар да сөйлемде бастауыштық қызметте жұмсалуы мүмкін<sup>1</sup>.

Дегенмен, сөйлемде бастауыштық негізгі қызмет атқаратын сөздер – зат есімдер мен олардың орнына жүретін есімдіктер.

Олар түбір тұлғада да, көптік, тәуелдеулі қалпында да бастауыш болады:

*Салиқа қырман басына келді. Колхозшылар астықты элеваторга жөнелтіп жасатыр. Біздің партиямыз, қаңарман халқымыз ұлы табыстарға жетті. Біз жүріп келеміз. Аттар алденеге құлақ тіге қалды. Анадайда бірдеңе қараңдагандай болды.*

Бастауыш қызметінде жұмсалатын сөздердің енді бір тобы – сапалық есімдер – сын есім, сан есім, есімше:

*Корқақ бұрын жұдырықтар. Алтай ала болса, ауыздағы кетер... Еккен орар.* (Мақал.)

Бастауыштар жеке сөзден болған – жалаң, көп сөзден құралған – құрделі не үйірлі болуы мүмкін (§46). Құрделі, үйірлі бастауыштарға мысалдар; Құрделігө: *Сөз құған* бәлеге жолығар. *Жақсы жұмыс* – жанға тыныс. *Ырыс алды* – ынтымақ. (Мақал.) Үйірлігө: *Білегі жұсан* бірді жығар, *білімі толық* мынды жығар. *Аузы күйген* үріп ішер. (Мақал.)

#### § 4. Зат есімдер мен есімдіктерден болған бастауыштар

Сөйлемде бастауыштық қызметте жұмсалатын сөздер, негізінде, зат есімдер болғанмен, олардың барлығының бастауыш болу қабілеті бірдей емес. Бастауыш – субъектінің

<sup>1</sup> Соң – өзінен бұрынғы сөзден бөлек жазылады деген сөйлемде, соң – бастауыш. Баспаханада әріп терушілердің сөзіне құлак салған кісіге мынадай сөйлемдер кездеседі. *Мына жердегі а шықпай қалытты, б теріс түсінімі.* Осында *a, b* – бастауыштар. Сол сиякты, әр уақытта баяндауыш қызметінде жұмсалады деп танылатын жіктік жалғаудағы етістіктер де субстантивтеніп, бастауыш қызметінде жұмсалуы мүмкін: *Көрдім-көп сөз, көрмедин – бір-ақ сөз.* (Макал). Мұндағы көрдім, көрмедин – бастауыштар.

грамматикалық баламасы. Ол іс істеуші қымыл иесі болатындықтан, сол қызметті өтей алатын заттардың аты арнаулы бастауыш болуға бейім болады. Сондықтан ондай зат есімдер арнаулы бастауыш болатын сөздер делінеді. Мысалға **Жарас ағаш екі**, деген сөйлемді алайық. Мұнда **Жарас**, **ағаш** деген екі зат есім бар. Ол екеуі сөйлемде екі түрлі қызметте айтылған: **Жарас** – қымыл иесі, бастауыш, **ағаш** – қымылдың объектісі, толықтауыш. Олардың орнын ауыстырганмен бірінің қызметінде екіншісі жұмсалған алмайды. Оның себебі – ол екі зат есімнің екі түрлі синтаксистік қызмет аткаруға бейімділігінде: **Жарас** – арнаулы бастауыш болатын сөз де, **ағаш** – арнаулы толықтауыш болатын сөз.

Зат есімдердің ол айырмашылығы қазақ тілінде *kisi*, *kisi emes* деген ұғыммен байланысты. Ол айырмашылықты зат есімдерге қойылатын екі түрлі сұрақтан да анғаруға болады. Жалпы алғанда, кім? деген сұрақты қоюға болатын зат есімдер (олардың орынбасар сөздері – жіктеу есімдіктері де) – арнаулы бастауыштар, не? сұрағын қоюға болатын зат есімдер – арнаулы толықтауыштар.

Сонымен қатар кейбір жанды-жансыз заттарға ғана тән іс-әрекет, қымыл, күй болуы мүмкін. Мысалы: *құс ұшты, buquerque сайрады, сиыр мөңіреді, жсауын жсауды, жел уілдеді*. Осындай сөйлемдерде бастауыш қызметіндегі зат есімдер баяндауыштар арқылы айтылған хабардың бірден-бір арнаулы иелері болып тұрады. Бірақ олардың мұндай әрекеті тар көлемдегі тіркестер арқылы ғана айтылады. Сондықтан мұндай сөздер бастауыш болып көп жұмсалмайды.

Осылардай, зат есімдердің бастауыш болу қабілеті бірдей болмағанмен олардың бастауыштық тұлғасы бәріне бірдей. Ол – атаяу септігі.

Атаяу септігіндегі зат есімдер жекеше, көпше және тәуелді тұлғада бастауыш болуына мысалдар:

*Лиза Рахметке бұрылды. (С. Ерубаев.) Кештетіп Қожаси үйіне келді. (С. Қобеев.) Сұр өвчарка* жсан жсуытар емес. (F. Мұстафин.) *Батырлық майданда сыналады...* (Мақал.) **Жауынгерлер** қатарланып тұрып қалды. (F. Мұсірепов.) *Сиырлар шұбан келеді. (F. Мұстафин.)* Қара қошқыл таулар ай астында көкшіл мұнарга оранып жыл-жырт қалғып тұр.

**Абайлар** Қарашиқыга түс ауа жетті... (M. Эуезов.)

Өздерінің лексикалық мағыналарында көптік үфімы бар зат есімдер жекеше тұлғада бастауыш болып та көптік мағынада жұмсалуы мүмкін:

*Қалың қой қыбыр етпей тыныштық алып, унсіз гана тыным алды. Сиыр атаулы... шалың суларга кіріп, көлбей-көлбей жасатып атты.* (М. Әуезов.)

Тәуелдік жалғаулы зат есімдер бастауыш қызметінде заттың кімге, неге тән екенін білдіреді де, ондай сөздің бастауыштық икемі арта түседі:

*Шешем қатты сағынып жүрген сияқты. (F. Мұсірепов.) Атым ерттеулі тұр. (F. Мұстафин.) Әкеңіз кім болған еді? (F. Мұсірепов.) Кімнің ісі көп болса, соның күші көп. (Мақал.)*

*Түйем шықты өріске,  
Боталарым маймаңдан.  
Қойым өрді қаптайлан,  
Қозыларым салды ойнақ.*

*Кілемдей жерім түрленді,  
Қызгалдағым гүлденді.  
Кемпірқосақ құрсаулап,  
Көгім де жаңа түрге енді.*  
(Жамбыл.)

Есімдіктердің ішінде бастауыш қызметінде көбірек жұмсалатындары – зат есімдердің орнын басатын есімдіктер. Олар – жіктеу, сілтеу, және кім? не? деген сұрау есімдіктері. Бұлардың ішінде әсіресе жіктеу есімдіктерін бастауыш қызметінде жиі кездестіруге болады. Сонымен қатар олар сөйлемнің жақтық мағыналарын түрлендіруші сөздер болып табылады.

Жіктеу және өздік есімдіктерінің бастауыш болуына мысалдар:

*Мен көрдім үзын қайың құлағанын... (Абай.) Біз барлаушылармыз. (F. Мұстафин.) Сіз кейін қалған соң, мен алдыңызды оралта беремін. (Б. Майлін.) Біз сірә, атты мықтап салықтырып алатын шыгармыз... (С. Мұқанов.) Қалқам, Айша, сен шаруаңа бар, мен де демалайын. (С. Шәрипов.) Ол – Өскенбайдың үлкен үйі Зере отырган ауыл. (М. Әуезов.) Өзі – жөн білетін, пысық жігіт. (F. Мұстафин.)*

*Бұған өзім кінәлімын. (З. Шашкин.)* Өзіміз де кедейміз, ата мекен жерімізді ешкімге бере алмаймыз. (Б. Майлін.)

Сілтеу, сұрау және басқа есімдіктердің бастауыш болуына мысалдар:

**Бұл** – Байжанның талай келген үйі. (С. Мұқанов.) **Мынау** – қай ауыл? **Әркім** әр түрлі шаруамен қарбаласады. (М. Эуезов.) **Ешкім** дыбыс шығармады. (С. Ерубаев.)

Заттың сындық, сандық, қымылдық сапасын білдіретін сөздер де сөйлемде бастауыштық қызметте жұмсалады. Ол үшін сапалық есімдер субстантивтеніп (заттанып) айтылады.

## § 5. Сапалық есімдерден болған бастауыштар

Заттың сындық сапасын білдіретін сын есімдер, ойды ықшамды етіп аз сөзбен білдіру керек болғанда, зат есімдермен қатарласып тұрмай-ақ, дара күйінде бастауыш және толықтауыш та болуы мүмкін. Ондайда сын есімдердің сапалық мағынасы жойылып кетпей, олар әрі заттық, әрі сындық мағынада жұмсалады. Сонда сын есімдер әдетте қандай заттардың сындық сапасы болып жұмсалатын болса, сондай заттардың бастауыштық қызметін аткарып тұрады<sup>1</sup>. Терен – көбінесе судың, теңіздің, көллің, өзеннің сынны болатын сөз. Сондықтан оны бастауыш қызметінде *Терен батырады* (макал) десек, алдымен “Терен су батырады” деп түсінмелі. **Жүйрік** – бұрыннан аттың сынны болып орнықкан. Бұл күнде поезд, машина туралы да, жүйрік деп айтуға болғанмен, *Жүйрік тоқтығын білдірмес* (макал) дегенде, оны алдымен “жүйрік ат” деп ұғамыз.

Заттардың ондай сындық сапасы синтаксистік қызметте бір ғана конкретті заттың орнына жұмсалмай, жалпылық мағынада, бір текстес көп заттың орнына жұмсалады. Тек сын есімдерден болған жер-су аттары мен басқа жалқы есімдер ғана даралық мағынада жұмсалады. Ондайда олар орнықты заттың мағынаға ие болып, зат есім қатарына (*Жуалы, Ақмойнақ*, т. б.) қосылады.

Соңғыларды қоспағанда, қазақ тіліндегі субстантивтеніп бастауыш болатын сын есімдер көбінесе кісі туралы айтылған сөздер болады:

<sup>1</sup>Бұл тек казак тілінде ғана емес, көп тілге ортак құбылыс болу керек. Оның солай екенін А. А. Потебяниның мына сөзінен де аңғаруга болады: “Я думаю, что во всяком языке, имеющем прилагательное это часть речи может указывать на носителя признака и в этом смысле обозначать его” (Из записок по русской грамматике, ч. I-II, 97-бет.)

**Кілең сұлулар бірыңгай отыр.** (С. Мұқанов.) **Жақсы** – ісімен жақсы. **Бұл сөзді тасып үқпас, талапты үгар.** (Абай.)

Субстантивтеніп бастауыш болатын сын есімдер, әсіресе, аз сөзben көп мағына беруді керек ететін макал-мәтелді сөйлемдерде жиі ұшырайды:

**Сытайы тоқбайды, қалтырайды.** **Жомарт** жоқтығын білдірмес. **Көп** қорқытар, **терең** батырапар. **Батыр** бір рет өледі, қорқақ мың рет өледі. **Жоққа жүйрік жетпес,** Ескіні есіце алмай, **жсаңа** жадыңа түспейді. **Үлкен** бастар, **кіші** қостар. (Мақалдар.)

Сын есімдер тәуелдік, көптік жалғауларда тұрыпта бастауыш қызметінде жұмсалады. Бірақ ол қағида сын есімнін бастауыш болуының бірден-бір шарты еместігі жоғарғы мысалдардан анық көрінеді.

Сын есім (есімшелер де) көптік, тәуелдік жалғауларсыз-ақ субстантивтеніп бастауыш болу үшін, олар бастауыштық әуенмен, дауыс ырғағы арқылы басқа сөздерден оқшауланып тұрулары керек.

Есімше де бастауыш болғанда, сын есімдей, қимылдық сапаның үстіне заттық мағына жамап тұрады. Есімшеден болатын бастауыштардың ерекшеліктері мынадай:

а) Баяндауышы етістік, зат есім, есімдіктерден болған сөйлемде есімше бастауыш қымыл иесі – кісі (сұрағы – кім?, не қылған?) орнына жұмсалады:

**Бәйгені озған алады.** **Көрмес** – түйені де көрмес. **Жығылған** күреске тоймас. Еккен орапар. **Ерінбеген** етікші болар. (Мақалдар.)

**Келген** – Жақып, **корген** – ол; **Турайтын** – мен де, **жейтін** – сен. **Екі аразды табыстыратын да, айыратын да, – арадағы кісі.** (Б. Майлин.)

ә) Баяндауышы сын есімнен болған сөйлемде есімше бастауыш басқа заттың мағынасында жұмсалады (сұрағы – не?, не қылған?, не еткен?):

**Қарауытқан қыста қызара бөртіп жылқы бақсан қызық та, қыын да.** (С. Бегалин.) **Берген** ұят емес, **алған** ұят.

б) Көптік жалғаудағы есімшелер бастауыш болғанда, олар әр уақытта қымыл иесі – кісі – мағынасында жұмсалады:

**Егін оратындар** әрі кетті де, **астық таситындар** қырман басында қалды.

в) Тәуелдік жалғауларда тұрып бастауыш болған есімшелер әр уақытта зат есім мағынасында жұмсалады (сұрағы – нем?, нең?, несі? Не қылған?, не еткен?):

*Жазғаның маган ұнады. Айтқаным түсінікті ме? Оның келер-келмесі белгісіз.*

Басқа айтарым жоқ.

Субстантивтеніп бастауыш болатын сөз табының бірі – сан есім. Есептік сандар бастауыш қызметінде заттық мағынада, жас мағынасында жұмсалады:

*25 үшке тең болінбейді. Оннан төртті алсаң, алты қалады.*

*25 маган тағы қайтып келді. Сәлемін алтын күннің айтып келді. (Жамбыл.)*

Жинақтау, реттік сандар ол қызметте көбінесе кісі туралы айтылған есім болады:

*Төр бөлмеден шыққан үшеу де ұзын столга ұзақ отырып қалды. Үшеуіміз етекті белге қыстырып алып жүріп кеттік. (Ә. Әбішев.) Үшінші кім? Алтыныш алға түсті.*

Жинақтау, есептік сан есімдер III жақтық тәуелдік жалғауда көбінесе бөлшектеу, кейде жинақтау мағынада бастауыш болады:

*Үш көрпенің екеуі қонақ астында, үш жастықтың екеуі қонақ шынтағында. Ерлі байлы екі адам бірі оны, бірі мұны істеп, екеуі де қонақ жабдығында жүр. (F. Мұстафин.) Механизм бөлшектерінің тоқсан тогызы дұрыс, бірі теріс болса, сол бір тоқсан тогызды бөгейді. (F. Мұстафин.)*

Жалпы алғанда, субстантивтенген бастауыштар мақалды-мәтелді сөйлемдерде көбірек кездеседі де, сөйлем арқылы айтылатын ойды ықшамды етуде үлкен қызмет атқарады.

## § 6. Күрделі және үйірлі бастауыштар

Бастауыштар да жеке сөзді – дара (жалаң), көп сөзден күралған күрделі не үйірлі және басқа сөйлем мүшелері сияқты бірынғай болады:

*Жаз келер қысты күнгі қысым өтіп,  
Қар, сұық, аяз, боран – бәрі кетіп.*

*(Шәкәрім.)*

Әлденеше сөз күрделі бастауыш болу үшін, олар өзара синтаксистік тығыз байланыста болулары керек те, сөйлемнің

баяндауышы сол сөз тіркесіндегі сөздермен байланысқан болуы керек:

1. *Самат екеуіміз қырманға бардық. Ертең канал қазу жұмысы басталады.* (С. Мұқанов.) 3. *Бұл өзеннің басы өмірі малдан арылған емес.*

Бұл мысалдарда күрделі бастауыштардың негізгі түрлері берілген.

1-мысалдағы сөйлемнің бастауышы – *Самат екеуіміз* – екі сөзден құралған. Бөлек алғанда, ол сөздердің жеке-жеке лексикалық мағыналары болғанмен, олар – сол тіркесте сөйлемнің бір-ак күрделі бастауыштары, оларды баяндауыштармен байланысина қарап та аңғаруға болады: тіркескен екі есім (бастауыш) I жақтық көптік мағынада болғандықтан, баяндауыш та сол грамматикалық мағынада, I жақтық тұлғада (*бардық*) айтылған.

2-сөйлемдегі *канал қазу жұмысы* деген сөздер – белгілі мағыналық, тұлғалық тұтастығы бар күрделі бастауыш. Сондай мағыналық тұтастық 3-сөйлемнің екі сөзден құралған бастауышында да бар: *өзеннің басы* деген күрделі бастауыш ілік септіктерінде зат есім мен көмекші есімнің тіркесінен жасалған.

Жоғарыдағыдан күрделі бастауыш болатын сөз тіркестерінің күрілісі, негізінде былай болады:

1) Илік септіктің жасырын түріндегі сөз бер үшінші жақтық тәуелдік жалғаулы сөздер тіркесіп, күрделі бастауыш жасалады:

*Милиция бастығы үйге кірді. Кедейлер тобы Есім айналасында. Жапон елі* – жер жузінде ең еңбеккөр мемлекет. *Кохоз маңы* – толған халық. *Адам тілі* тас жарар, тас жармаса, бас жарар. (Мақал.)

Қазақ тілінде ілік жалғаудың ашық түрі мен “жасырын” түрінің сөзге қосатын мағынасы, сондай-ак, өзімен байланысып тұрған тәуелдік жалғауындағы сөздерге қатысы бірдей емес: ілік жалғау жалғанбай “тасаланып” тұрған сөздің меншіктілік мағынасы күнгірттенеді де, сөз тіркесі тұтасып, бір күрделі мүше ретінде жұмсалады, сол себептен кейде солай тіркескен екі сөз бір заттың аты болып та айтылады (мысалы: Арап теңізі, Үкімет үйі, Абай көшесі, т.б.) Илік септігіндегі есімдер тағы мынадай сөздермен тіркескенде, күрделі бастауыш болады:

а) Тәуелді көмекші есімдермен (*қасы, жсаны, алды, арты, маңы, іші, бойы, т.б.*): *Кохоз маңы ығы-жығы.* Үйдің іші су

сепкендей болды; *Ауылдың жасаны* – терең сай, Тасыған өзен сүрілдеп. (Абай.)

Ә) Тәуелдеулі өздік есімдікпен: менің өзім, сенің өзің, оның өзі, олардың өздері; мұндай тіркестің ілік септіктегі есімдіктері атау күйінде де айтылады:

*Мен өзім кінәлімін.* (З. Шашкин.) – *Сен өзің ұрысқақ бала екенсің!* *Сен өзің ектиң бе, Оразжан?..* *Дамешітің өзі де тап Ораздай құрыш құя алмайды.* (З. Шашкин.) – *Мен өзім* соны сізден сұрайын деп тұр едім, – деді Раҳмет. (С. Ерубаев.)

2) Бастауыш құрамында екеуіміз, үшеуіміз, дегеніміз, деген сөздері айтылып күрделі бастауыш жасалады:

*Сен екеуіміз өлмейтін әке тауып алғанымыз жоқ па?* (С. Ерубаев.) *Дүйсен екеуіміз жүріп келеміз.* *Топ дегеніміз – төрт* теке мен Жұман. (М. Әуезов.) *Идея дегеніміз – шыгармадагы негізгі ой.* (“Оқу кітабы”.)

Негізгі және көмекші етістіктер (субстантивтенген), есімдер тобы күрделі бастауыш болады:

*Мениң айтып отырганым – ақыл. Күле беру ұят болады.*

3) Субстантивтенген күрделі сын есім, сан есімдер тобы күрделі бастауыш болады:

*Ақ бесті* қара қасқадан сыйылыш шықты. *Жүйрік торы* ойнақшып тұр екен. *Бір жұз қырық алты* үшке тең болінбейді.

4) Көп сөзден болған күрделі жалқы есімдер күрделі бастауыш болады:

*Аудандық оқу болімі* жұмысқа қызу кірісті. *Сауда министрлігі* ауыл мен селодан жүздейген магазиндер ашты. *Біріккен Ұлттар Ұйымы* – дүние жүзі елдерінің бас қосып, кеңес құратын жері.

*Кісі аты, фамилиясы, жолдас, азамат* дегендей қосалқы айқындауыштармен тіркесіп күрделі бастауыш болады:

*Жамалбек Тұрганбаев* жолдас баяндама жасады. *Жұматаев азамат* үлгілі іске қол ұрып отыр.

Үйрлі бастауыштар да көп сөзден құралады. Оның күрделіден айырмашылығы мынау:

Егер күрделінің құрамы түйдекті тіркесті болса, үйрлі бастауыштардың құрамында бастауыш-баяндауыш ынғайындағы сөздер тобы болады, мысалы:

*Білегі жуан бірді жыгар, білімі толық мыңды жыгар.* (Мақал.) *Мен корген* бұл кісі емес. *Баласы мерген* қайсың? *Баласы мерген* – мен. *Жасы құрдас* – құрдас емес, заманы бір – құрдас. (Мақал.)

## БАЯНДАУЫШ

### § 7. Баяндауыштың жасалуы

Сөздердің түбір күйінде баяндауыш болуы. Қай сөздің болса да сөйлемде баяндауыш қызметінде тұруы сол сөйлемдегі субъектілік, предикаттық қатынастан көрінеді. Сондықтан баяндауыштың қызметі басқамүшелермен, әсіресебастауышпен, қатар қойып айтқандай айқын болады: *қара, керек сөздерін сен малға қара, мысыққа ойын керек* дегендегі тіркесте айтқанда болмаса, олардың баяндауыш екендігі белгілі болмайды. Рас, бірқатар сөздердің атау, түбір күйінде маңында басқа сөздер болмаса да баяндауыш қызметінде екені айқын болатыны бар. Көтеріңкі дауыспен *Шық! Мақұл! Дұрыс! Масқара!* дегенде, олар жеке тұрып-ақ баяндауыш қызметінде жұмсалуы мүмкін. Бірақ ондайда олар сөйлемдік әуенмен айтылуға тиісті не маңында басқа сөздер болуы керек.

Сондай дара тұрып, түбір күйінде көбірек баяндауыш болатын сөздер – етістіктер. Олардың түбір күйінде баяндауыш бола кетуінің себебі олардың II жақтық грамматикалық мағынаны да білдіруімен байланысты болу керек. Сондай сөздердің баяндауыш қызметінде жұмсалуы олардың айтылу жағдайымен де байланысты. Жападан-жалғыз жайбаракаттанып отырған кісі қоңыр дауыспен өзінен-өзі *шық, тұс* десе, сырттан тыңдаған кісі не айтып отырғанын тұсінбес еді, айтып отырғаны қай *шық*, қай *тұс*, – етістік мағынасындағы *шық, тұс* пе не зат есім мағынасындағы *шық, тұс* не? Ал бір кісі екіншісіне есік жаққа бас изеп *шық* десе, не атты кісіге қарап жерде тұрған кісі *тұс* десе, онда жоғарғы сөздердің баяндауыштық мағынасы айқын болады. *Мен, рас* деген сөздер жеке айтылса, баяндауыш болмас еді. Ал *Мені шақырган кім?* дегенде: – *Мен, десе, осы айтып отырғаның рас па?* дегенде: – *Rас десе, олар толық мағыналы баяндауыш болар еді.*

Сөйтіп, жоғарғыдай жеке сөздердің өз алдына баяндауыштық қызметте тұруы олардың басқа сөздермен мағыналык байланыста айтылуынан болып отыр.

Есім сөздер де түбір күйінде, ешкандай баяндауыштық жалғау жалғанбай-ақ баяндауыш бола береді. Бірақ ол үшін бастауыш пен баяндауыш қатар айтылу керек. Сонда олардың

сол қызметте жұмсалуына себеп болатын жағдай олардың сөйлемде белгілі орында тұруы болады. Жамал отызда. Ол тәртіпті. Сапар – доктор, т.б.

Оның үстіне баяндауыш бастауыштан дауыс ырғағы арқылы болініп, онымен карсыласа қабаттасып келеді. Ондай амалмен баяндауыш болған сөздің де бастауышпен байланысы әрі мағыналық, әрі грамматикалық болады. Оларды бастауышсыз айтуға болмайды, бұл – бір; екіншіден, бастауыш көптік мағынада, көптік жалғауында айтылғанмен, оның есім баяндауышы, П.М. Мелиоранский айтқандай емес<sup>1</sup>, көптік жалғауында тұрса да, тұрмаса да бастауышпен грамматикалық байланыста бола береді: Олар – окушы, Олар – окушылар.

Етістіктің кел, ал, бер, отыр сиякты түбір күйі де сол қалпында, жіктік жалғауынсыз-ақ, сөйлемде тұрған орынана қарай, баяндауыш бола береді дедік. Бірақ олар II жактық мағынада айтылып қалыптасқандыктан, кейде бастауышсыз да жұмсалады, бастауышпен орын ауысып та айтылады: Кел, балалар, оқылық. (Ы. Алтынсарин.) Тында, дала, Жамбылды. (Жамбыл.)

Түбір етістіктердің ішінде жактық мағынасы екі түрлі болып келетіндері: тұр, отыр, жатыр, жұр. Бұлар осы қалпында дара тұрғын II жактық та, III жактық та баяндауыш болуы мүмкін<sup>2</sup>.

Бірақ бұл етістіктер ондайда екі түрлі шактық мағынада, екі түрлі синтаксистік байланыста жұмсалады; олардың жактық мағынасын сол өзгешеліктеріне қарап айтуға болады:

Сен орындықка отыр (келер шак). Ол орындықта отыр (осы шақ). Сен өз орнында тұр (келер шак). Ол орнында тұр (осы шак). Сен өз орнына жат (келер шак), Ол өз орнында жатыр (осы шак). Сен қалаға жұр (келер шақ). Ол қалада жұр (осы шак).

Сөздердің грамматикалық тұлғалар арқылы баяндауыш болуы. Баяндауштардың морфология – синтаксистік тұлғасы – жіктік жалғаулары. Жіктік жалғаулар – әрі баяндауыштың тұлға, әрі бастауыш пен баяндауышты өзара байланыстыратын синтаксистік тұлға. Олар тек етістікке ғана емес, баяндауыш қызметіндегі I, II жактық есімдерге де жалғанады.

<sup>1</sup>П. М. Мелиоранский былай деген болатын: “Есімдерден болған баяндауыш еш уақытта көптік жалғауын қабылдамайды”, “Краткая грамматика казах-киргизского языка”, ч. II синтаксис. СПб, 1897, 2-бет.

<sup>2</sup>Тек жатыр етістігі II жакта жат болып айтылады. Ал оған баяндауыштың жалғауды көсип айту керек болғанда, бастаның қалпын сактайты: Сен жатырын.

Егер жіктік жалғаулар етістіктердің отыр, тұр, жүр, жатыр деген төрт етістікten басқаларының түбіріне тікелей жалғанбай, көсемше, тұйықрай қосымшаларынан кейін ғана жалғанатын болса, есімдердің негізгі, туынды түбірлеріне де, тіпті, жатыс, шығыс септіктеріндегі сөздерге де жалғана береді: Мен қырықтамын; Біз бәріміз бір колхозданбыз. Бұдан жіктік жалғаудың сөздерге жалғану мүмкіншілігі үлкен, синтаксистік қызметі әрі орнықты екенін, әрі бастауыштың тұлғасын бастауыштан көруге мүмкіндік беретін грамматикалық форма екенін аңғарамыз.

Тұркі тілдерінің бірқатарларында (мысалы: өзбек, құмық, т.б.) есімдерден болған баяндауыштарға кейде дүр, дир, дыр, тұр тұлғасы жалғанады. Қазактың қазіргі әдеби тілінде ол баяндауыштық тұлға жұмсалмайды десе де болады. Оны фольклордан, өткен ғасырлардағы әдебиеттен ғана кездестіруге болады.

Жақсылыққа жамандық –  
Әр кісінің іci дүр.  
Жамандыққа жақсылық  
Ер кісінің іci дүр.  
(Мақал.)

Баяндауышы қызметі жіктік жалғаулардай болмағанмен, көбінесе баяндауыш болған сөзге жалғанатын қосымшаның бірі – **дікі, – нікі (ның – кі)**. Ол – тұлғадағы есімдердің қазақ тіліндегі предикаттық мағынасы басқа тұркі тілдеріндегідей деуге болады.

Ол қосымша жалғанған баяндауыштар, жоғарыда айтылғандай, басқа затқа меншіктелмейді, басқа затты өзіне тәуелді етіп, өзі меншік иесі болады. Мысалы:

СССР-де барша өкімет қала мен деревнядагы еңбекшілердікі, яғни еңбекшілер депутаттарының советтерінікі. (СССР Конституциясы.) **Киіз кімдікі** болса, білек **соныкі**. (Мақал.)

Айтқаныңыз келсе, Кертөбел сіздікі.

Осынау үй кімдікі? – **Кәрібайдікі**. Эне біреу үй **Құтжсан дегендікі**. (F. Мұстафин.)

– **Нікі, – дікі** қосымшасы жалғанған сөздердің баяндауыш болу амалы да оның сөйлемдегі орнымен байланысты. Солай болатындықтан ондай тұлғадағы баяндауыштар бастауыштардан соң тұрады, бастауышсыз айтылмайды. Өйткені ондай баяндауыштардың меншіктеп тұратын заттары сол сөйлемдердегі бастауыштар болады.

*Сенің ұлың менікі,  
Бақытты біздің жердікі,  
Ер өмірі күнде той,  
Ойқай, қызық заман гой!*  
(Жамбыл.)

Баяндауыштардың негізгі түрлері. Сөз табының бәрі де баяндауыш бола алады. Дегенмен көбінесе баяндауыштық қызметте жұмсалатын сөздерді жіктегендегі, олар мынадай басты-басты негізгі екі салаға бөлінеді:

1. Етістік баяндауыштар: 2. Есім баяндауыштар. Етістік баяндауыштар да, есім баяндауыштар да дара, күрделі және ол екі түрі аралас айтылған құрама болуы мүмкін.

## ЕТИСТИК БАЯНДАУЫШТАР

### § 8. Етістіктерден болған дара баяндауыштар

Етістіктердің сөйлемдегі негізгі қызметі – баяндауыш болу. Олардың баяндауыш болу қабілеті өте қүшті. Сондықтан қазақ тілі сөйлемдері баяндауыштарының дені – етістікті баяндауыштар. *Айттым, болды. Кестім, үзілді!.. Тараңдар!.. Жұр.* (F. Мұсірепов) дегендегідей олар дара күйінде-ак баяндауыштық қызметте бір құрамды тиянақты сөйлем болып та келеді немесе *Тереңге мені сал, биікке мені жұмса* (F. Мұсірепов) дегендегідей, озіне басқа сөйлем мүшелерін ілеңстіре көп құрамды сөйлемнің жетекшісі болып та кездесе береді. Бұл жағынан етістік баяндауыштар, есім баяндауыштарға қарағанда, тиянақты предикат қана емес, сөйлемдегі басқа мүшелердің, діңгекті орталығы да болып, субъектінің қимылын, күйін, іс процесін білдіреді. Етістіктердің сөйлемдегі басқа қызметінен гөрі баяндауыш қызметінде жұмсалуынан олардың өздеріне тән мағыналық, грамматикалық ерекшеліктері айқын көрінеді. Мысалы, салт, сабакты етістіктердің баяндауыш болу амалы бірдей, бірақ олар қатысқан сөйлемнің құрамы бірдей емес. Мысалы:

*Кәрі Каспий қара көк көзін ашты, жылды жүзбен Терекке амандасты. (Абай.) Амантайдың жүргегі аттай тулады... Ол тутіннің исі жерге жоламайды. (С. Мұқанов.)*

Осы мысалдардағыдай, салт етістік баяндауыш болған сейлемде тұра толықтауыш болмайды (мысалы: ...амандасты, ...тулады), ал сабакты етістікті сейлемде онымен байланысты тұра толықтауыш болуға тиіс (мысалы: көзін ашты.)

Етістіктің сабакты және салт болуы сияқты, болымды және болымсыз болуы да етістік атаулыға ортақ болғандықтан, оның баяндауыш қызметінде жұмсалуында да ерекшелігі жоқ. Дегенмен солар арқылы болымды, болымсыз сейлемдер жасалатындықтан, олардың баяндауыш болуын ерекше атау керек болады. Оның үстіне *айтпаймын*, *жазбаймын* деген сияқты, ашық райлы болымсыз етістікті баяндауыштың кейде *айтпан*, *жазбан* болып айтылуында стильдік айырмашылық болады. Мысалы, бір істі істеуден үзілді-кесілді бас тартқанда, айтылған хабарға өктемдік сипат беру керек болғанда, соңғы формалар қолданылады. Бұл көбінесе ауыз әдебиетінде жиі ұшырасады:

*Тәуекелге келгенде, алдымда тау тұрса да, тайынбан.*  
(F. Мұстафин.) *Өлеңім – оқ, ол алдымда. Мен де жаудан шегінбел.* (Жамбыл.)

*Алдыңа келіп тұрмын деп,  
Ар-намысымды қашырман.  
Бұлтқа жетпей шарт сынбан,  
Айта келген сөзім бар,  
Не қылсан да жасырман.*  
(Махамбет.)

Етістіктер райлық, шактық тұлғаларының барлығында да баяндауыш бола береді.

*Мен көрдім ұзын қайың құлаганын.* (Абай.) *Бізді ешкім таныстырымады, өзімізтанисайық.* (F. Мұстафин.) *Кел, балалар, оқылық, Оқығанды көңілге тоқылық.* (Ы. Алтынсарин.)

Етістіктер етіс тұлғаларында да баяндауыш қызметінде жұмсалады:

*Өнер-білім бар жұрттар, тастан сарай салғызды.*  
(Ы. Алтынсарин.) *Қантады қол, салынды жол, бұзылды тау, кесілді шөл:* (A. Тоқмагамбетов.) *Қырдағы ел ойдағы елмен араласып, Күлімдесін, көрісін, құшақтасып.*  
(Абай.)

Кесемше тұлғалы етістіктер дара күйінде құрмалас сейлемдердің баяндауыштары болып келе береді (Жаңбыр жауып, жер көгерді), бірақ кейбір өлеңде болмаса, жай сейлемнің тиянақты баяндауышы бола алмайды.

Есімшелердің баяндауыш қызметінде жұмсалуы басқа есімдердей: I, II жақта баяндауыштық жіктік жалғауда айтылып, етістікпен қысысып тұрады, III жақта жіктік жалғауда жалғанбайды.

## § 9. Етістіктерден болған күрделі баяндауыштар

Күрделі етістікті баяндауыштың құрамы. Қазак тілінде де әлденеше етістіктер түйдекті топ құрып, баяндауыш қызметінде жиі кездесетіні белгілі. Олардың көп құрамады болудағы баяндауыштық негізгі қызметі – қымыл процесінің құбылмалы нәзік ренктерін білдіру. Әлденеше етістік бір күрделі баяндауыш болғанда, оның біреуі ең негізгі болады да, калғандары оған не біріне-бірі көмекші болады.

Қазак тілінде көмекші етістіктер көп, олар аса жиі колданылады; арнаулы көмекші етістіктерден басқа негізгі етістіктердің де бірталайы көмекші болып жұмсалған береді. Олардың өзара көсемше, есімше тұлғалар арқылы байланысқан түйдекті тобының құрамы екі я үш, кейде төрт я бес етістікті болып та келеді.

*Кітап оқып кетіп бара жатыр едім, сурініп кетіп, жығылып қала жаздады.* деген бір күрмалас сөйлемнің ішіндегі он бір сөздің кітап дегеннен басқалары – түгелімен етістіктер. Олардың алдыңғы сөйлемдегі *оқып кетіп бара жатыр едім* деген бесеуі біріне-бірі ұласқан бір істің жайын хабарлайтын бір мүше (баяндауыш) болып тұр. Екінші сөйлемде бес етістік бар. Оның алдыңғы екеуі (*сурініп кетіп*) пысықтауыш қызметінде де, соңғылары (*жығылып қала жаздады*) баяндауыш қызметінде жұмсалып тұр. Соңғы үш етістік аяқталмаған кимыл процесін білдіреді. Өйткені, оны *жығылып қалым, жығылдым* дегендермен салыстырғанда, бұл мағына анық көрінеді: *жығылдым* – болған оқиғаны сол калпында өткен факт ретінде ғана білдірсе, *жығылып қалым* – қымылдық күйдің бұлай болуы тыңғылықты екенін, оның субъектінің еркінен тыс болған факт екенін білдіреді. Осыдан негізгі баяндауыштық мағына бірінші етістік *жығылып* екенін, *қала етістігі оған көмекші* екенін аңғаруға болады. Сол сияқты, *аяғын тайып кете берді* дегенде, *тайып* – негізгі, *кете* – оған көмекші ал екеуін қосып, *тайып кетті* десек, қымылдың аяқталғаны білінеді, ал *тайып кете берді* дегенде, олардың бұрынғы мағынасы құбылыш, қымылдың бірнеше рет қайталанғаны білінеді.

Сөйтіп, кимыл процесінің құбылмалы болуы – көмекші етістіктерге байланысты. Көмекші етістіктер тиянақсыз тұлғадағы негізгі етістіктермен тіркесіп, оның мағынасын я толықтырып я тиянақтандырып тұрады. Ондай синтаксистік тіркесте баяндауыштық тұлғалар көбінесе ең соңғы көмекші етістіктерге жалғанады, көсемше, кейде есімше тұлғалы негізгі етістіктер сол көмекші етістіктер арқылы тиянақты қалыпқа түседі. Олай болу түркі тілдерінің бәріне тән<sup>1</sup>.

Күрделі баяндауыш құрамындағы етістіктердің қызметі. Көмекші етістіктер жоғарғыдай синтаксистік тіркеске түсіп, баяндауыштың шақтық, тұрпаттық (видтік), модальдық, т.б. мағынасын түрлендіріп, кейде бір қалыптан екінші қалыпқа түсіреді. Ондайда кез келген етістік катар қойылып, оның алдыңғысы негізгі, соңғысы көмекші қызметте жұмысала берілмейді, олардың біріне-бірі үйлес келетін, бірін-бірі толықтыратын, кейде біріне екіншісінің мағынасына карсы келетін етістіктерден құралып, синтаксистік бірлік жасалады. Профессор В. Насилов су **ағып тұр** деген сияқты тіркестегі етістіктерге талдау жасай келіп, **ағып** етістігінің динамиканы білдіретінін, **тұр** етістігінің статиканы білдіретінін, сөйтіп ол екеуі тұтасып үздіксіз болып жатқан кимыл әрекетін білдіретінін көрсетеді<sup>2</sup>.

Баска түркі тілдеріндегі сияқты, қазак тілінде де күрделі етістіктердің құрамы алуан-алуан болады: кейде жоғарғыдай бірі динамикалық мағынадағы етістіктер немесе екеуі де статикалық не динамикалық мағынадағы етістіктер болады; кейде одан да баска кимылды, құйді білдіретін етістіктер тіркесіп, күрделі баяндауыш болады. Соған лайық, олардың екінші компоненттерінің негізгі етістіктерге қосатын мағыналары да әр түрлі болады. Оны аңғарту үшін бір тұлғадағы негізгі етістіктерге түрлі-түрлі көмекші етістіктерді тіркестіріп, салыстырып байқайық:

*Бере баста, бере тұс, бере сал;  
тұра тұр, тұра бер, тұра қал;  
шыға тұр, шыға баста (ды), шыға қойма (ды), шыға келді;  
кіріп келді, кіріп алды, кіріп жатыр, кіріп болды, кіріп  
қойды;  
жазып бер, жазып ал, жазып таста (ды), жазып көр.*

<sup>1</sup> В. Насилов “Роль, сказуемого в уйгурском предложении” (Труды института востоковедения), № 1 жинақ, 1939, 186-бет.

<sup>2</sup> Бұл да жоғарыда аталған макалада.

Негізгі етістіктер мен көмекші етістіктер түйдекті топ құрып құрделі, баяндауыш болғанда, субъектінің кимыл процесінің әр түрлі құбылыстарын, мысалы: істің, кимылдың біткенін, бітпегенін, олардың қарқынын, тыңғылықтығын, тыңғылықсыздығын; бастау, аяқталу кезеңдерін білдіреді. Мысалы, *Оқушылар клубқа кіріп жатыр* дегенде, құрделі баяндауыштар бітпеген кимылды білдірсе, *Олар үйге кіріп келе жатыр еді* дегенде, баяндауыш жаңа ғана басталған кимыл процесінің ұласпалы қалпын білдіреді. *Ол жұғіріп келеді* дегенде, баяндауыш бастауыштың аяқталмаған әрекетін білдіреді. Ондайдын әлі де көпке созылғандығын білдіру үшін қазақ тілінде баяндауыш қайталанып та айтылады:

*Жапан дағада жсан-жасына алақатап жалғыз әйел жортып барады, жортып барады.* Кең дағада жалғыз адам *жұзіп келеді, жұзіп келеді.* Өзгеше бір күй кең дағаны күңірене *шайқай береді, шайқай береді.* (F. Мұстафин.) *Зытып келеді екем, зытып келеді екем.* *Күгінши қуып келеді екен, қуып келеді екен.* Нанды жалмаған тарақандардай-ақ *жалмай береді, жалмай береді.* (М. Горький.)

Баяндауыштардың осылайша қайталанып айтылуы арқылы да кимылдың созылындығын білдіруі – құрделі етістік баяндауыштардың жұмсалуындағы стильдік ерекшеліктің бірі. Бұлай айтудың тағы бір қызыметі бар. Ол – баяндауыш арқылы айтылған ойды бекемдей, нығыздай түсү;

*Ол қыз – Ботакөз десе – бома көз.* (С. Мұқанов.) *Ешкімнің ақылының керегі жоқ.* *Барамын деген соң – барамын.* (Б. Майлин.) *Барса барсын! Барсаң бар!* – деді Павел. (М. Горький.)

Дәл осы сиякты болғанмен, істің, кимылдың созылынқы не дем арасында орындалғанын білдіру үшін, кейде негізгі етістіктер тиянакты тұлғада айтылып, одан кейін тұратын көмекші етістіктерден бүрін *да/де* демеулігі айтылады: *Ол сойлейді де отырады.* Сен күні бойы үйде отырасың *да қоясың;* үйге кірдім де шықтым; *жұдырықпен қойды да жіберді.* *Тұнжыраған қарақаттай екі көзі жаутаңдан мөлдірейді де тұрады.* Әп-сәтте Амантай тобы солдаттарга араласты да кетті, (С. Мұқанов.) *Тогжан ...маган деген өкпе-назын айта жонелетін сияқтанады да тұрады.* (М. Эуэзов.)

Негізгі етістіктерді кос сөз ретінде косарлап айту арқылы да кимылға созынқылық өн беріледі:

*Екеуі бізді қөріп қалды да, атып-атып* жіберді. (Ә. Әбішев.) *Майбасар Байсұғірді қамшымен тартып-тартып* жіберді. Есігі дамыл таптай *ашылып-жабылып* жатыр екен. (М. Эуэзов.)

## § 10. Күрделі баяндауыштардың қимыл кезеңдерін білдіруі

Қазақтілінде, орыстіліндегідей, сараланған видтік категория жоқ. Бірақ күрделі етістіктерден болған баяндауыштар әр түрлі құрамда айтылып, әр түрлі қимыл кезеңдерін білдіреді. Олардың бастылары мыналар:

1. Қимылдың басталу кезеңі. *Отыр, қал, жатыр, кел, баста, жонел, т.б.* көмекші етістіктер катысты қүрделі баяндауыштар қимылдың не күйдің басталып қалғанын, басталғанын білдіреді:

*Таң бозарып атып келеді. Коля кеткелі жатыр. (F. Мұсірепов.) Зылиха шай құя бастады. Жақып сөйлей жонелді. (F. Мұстафин.)*

2. Қимылдың болып жаткан кезеңі. Мұндай мағынада жұмсалатын баяндауыштың құрамында *тұр, кел, бер, жүр, қой, тұс, т.б.* көмекші етістіктері болады:

*Жарқыраган май күні... тамылжып тұр. (M. Әуезов.) Қалуемт Баршағулге күле сөйлем келеді. (F. Сланов.) Жомарт тагы бірдеме үйретіп жүр. Ахмет оның жүзіне қарап қояды да сөйлей береді. (F. Мұстафин.)*

3. Қимылдың аяқталып қалған кезеңі. Мұндай мағынаны білдіретін қүрделі баяндауыштың құрамында *қал, кел, кете, жазда сияқты* көмекші етістіктер болады.

*Жұмыс аяқталып қалды. Жиналыс бітіп келеді. Күнше Жабайды согып кете жаздады. (F. Мұсірепов.)*

4. Қимылдың аяқталған кезеңі. Қүрделі баяндауыштар бұл мағынаны білдіру үшін олардың құрамында *жібер, кет, бер, бол, қой, таста* сияқты көмекші етістіктер болады:

*Хатты кеше баласынан беріп жіберді. Жолаушылар жүріп кетті, Әміреге кітап алғып бердім. Ол айтып болды. Бригада жұмысын бітіріп қойды. Мақаланы кеше-ақ жазып тастадым.*

5. Қимылдың дүркінділігі. *Қой, бер, жатыр, отыр, тұс, бар сияқты* көмекшілер катысты қүрделі баяндауыштар қимылдың қайталанғанын, істін дүркін-дүркін істелгенін білдіреді:

*Абай курсініп қояды. (M. Әуезов.) Жақсылық күлімдей тұсті. (F. Сланов.) Жылқы етінің иісі мұрныңды жарып барады. (F. Мұстафин.) Қонақтар бірінен соң бірі келіп жатты.*

Қимылдың түрлі кезеңдерін білдіруге көмекші етістіктердің катысын жоғарғы мысалдардан байқауға болады. Әрине, жоғарыда санағандай бір көмекші әр уақытта сол аталған қимыл кезеңін білдіріп қоймайды, олар катысты негізгі етістіктердің қай